

आकाशवाणी जयपुर-अजमेर

समाचार

- केन्द्र सरकार बधती गर्मी अर लू रा हालात ने ध्यान राखता थकां राज्यां ने हिफाजत रा इन्तजाम तैय करण सारू हुकम दीना ।
- राज्य मांय पड़ रही ज़ोरदार गर्मी बीचे न्यारा-न्यारा ज़िलां मांय लू ऊँ बचाव सारू हीट एक्शन प्लान लागू करी ज्यो ।
- प्रधानमंत्री नरेन्द्र मोदी विकसित भारत बणावण सारू महिलावां री माली भागीदारी बधावण माथे ज़ोर दीनो ।

अर

- प्रदेश मांय निवेश अर कारोबार ने बधावो देवण सारू इंडो-अमेरिकन चैम्बर ऑफ कॉमर्स राजस्थान चैप्टर री सरूआत कीनी ।

000

केन्द्र सरकार मजूरां ने तेज़ गर्मी अर लू ऊँ बचावण सारू राज्यां अर केंद्र रा राज वाळा प्रदेशां ने राय जारी कीनी है । श्रम अर रोजगार मंत्रालय राज्यां अर केंद्र रा राज वाळा प्रदेशां रा मुख्य सचिवां अर प्रशासकां ऊँ पीवण रा पाणी री ज़रूरी पूर्ति तैय करण अर आराम री ठौड़ां अर कमठाणां ने ई ठंडा राखण रा जतन करण बाबत् कह्यो है । ई सागे ई ओ.आर.एस., आईस पैक अर लू ऊँ बचाव री सामग्रियां रो ज़रूरी भण्डार तैय करण सारू ई कही ज्यो है । राष्ट्रीय मानवाधिकार आयोग ई ज़ोरदार तावड़ा अर लू रो कोप वाळा 21 राज्यां रा मुख्य सचिवां ने कागद लिख र लू ऊँ बचाव रा सगळा जतन करण सारू कह्यो है । राज्य मांय ई राज्य मांय ज़ोरदार गर्मी ने ध्यान राखता थकां चिकित्सा अर स्वास्थ्य विभाग री ओर ऊँ जनता ऊँ एहतियात राखण री अरज करी ज्यी है ।

000

राज्य रा घणखर हलकां मांय पड़ रही ज़बरदस्त गर्मी बीचे कटे-कटे आंधी-बारिश ई व्हे रही है । घणखर ठौड़ां दिन री बगत पारो 44 ऊँ 46 डिग्री सेल्सियस बीचे दर्ज कर्यो जा रह्यो है जो सामान्य ऊँ घणो बत्तो है । जैसलमेर, बाड़मेर, कोटा, झुंझुनू अर फलौदी मांय दिन री बगत चाल रही लू सागे रात मांय ई घणी गर्मी पड़ रही है । तेज़ गर्मी रे बीचे जनता ने लू ऊँ बचावण सारू कोटा अर जयपुर मांय सड़कां माथे पाणी रो छिड़काव कर्यो जा रह्यो है । मौसम विभाग रे मुजब आज 11 ज़िलां मांय आंधी चालण सागे बिरखा व्हेवण रा आसार है । अलवर, झुंझुनू अर कोटपूतली-बहरोड़ मांय ज़ोरदार बायरो बाजण री संभावना है ।

000

प्रधानमंत्री नरेन्द्र मोदी कह्यो है के महिलावां री हिफाजत माथे सरकार रो खास ध्यान है । वे आज वाराणसी मांय राख्यी ज्या नारी वंदन सम्मेलन मांय बोल रह्या हा । श्री मोदी कह्यो के महिलावां तमाम चुनौतियां रे बावजूद हर हलका मांय आगे बढ रही है । वे कह्यो के महिलावां ने हिफाजत रो माहौल मुहैया करावणो सरकार री ज़िम्मेदारी है । वे महिलावां ने विकसित भारत रो मजबूत आधार स्तंभ बतायो । प्रधानमंत्री कह्यो के विकसित भारत बणावण सारू महिलावां री माली तौर ऊँ भागीदारी बधावणो ज़रूरी है ।

-----

ई मौके प्रधानमंत्री उत्तर प्रदेश, मध्यप्रदेश अर महाराष्ट्र ने जोड़बा वाळी दो नुवी अमृत भारत एक्सप्रेस रेलगाडियां ने ई हरी झंडी बता र रवाना कीनी। अ दोन्यू गाडियां सरू व्हेवण सागे ई देश मांय अमृत भारत एक्सप्रेस रेलगाडियां री तादाद बध र 66 व्हे जावेला।

000

ऊर्जा मंत्री हीरालाल नागर आज जयपुर मांय ऊर्जा विभाग रा कामकाज रो जायजो लेवण सारू अहलकारां सागे मीटिंग कीनी। ई दौरान उनाळा मांय बिजली री जरूरी पूर्ति, सूरज री रोशनी ऊं बिजली बणावण रा हलका मांय कुसुम योजना री प्रगति समेत न्यारा-न्यारा मुद्दां माथे चर्चा करी ज्यी। ई दौरान बिजली कटौती कम करण अर किसानां ने दिन मांय बिजली देवण ऊं जुड़ी व्यवस्थावां करण रा हुकुम दिया ज्या।

000

राज्य सरकार कानी ऊँ चलायी जा रही जनता रा भला री योजनावां री जाणकारी जनता ताई पूगावण सारू प्रदेश मांय ग्राम रथ अभियान चलायी ज्यो है। 15 दिन रा ई अभियान रे जरिये जयपुर मांय आवता महीना व्हेवण वाळी ग्लोबल राजस्थान एग्रीटेक मीट-ग्राम-2026 रो प्रचार-प्रसार कर्यो जा रह्यो है। आज सलूमबर, बाडमेर, पाली, जैसलमेर, कोटा, चूरू अर डूंगरपुर समेत केई जिलां मांय विकास रथ रवाना करी ज्या। अ रथ खेती-बाड़ी, पशुपालन, बागवानी अर फूड प्रोसेसिंग समेत 13 महकमा री योजनावां री जाणकारी गांव वाळां ताई पूगावेला। ई दौरान कला जत्थां रे जरिये ई जाग जगायी जावेला। डूंगरपुर मांय जिला रा प्रभारी मंत्री बाबूलाल खराड़ी अ रथ रवाना कीना ई मौके वे कर्हयो के अभियान रे दौरान रोजीना सिंज्यां री पोर चौपाल ई लगायी जावेला।

000

मुख्य सचिव वी. श्रीनिवास अहलकारां ऊं आप-आप रा हलका मांय नुवा-नुवा काम करणं सारू कर्हयो है। वे आज जयपुर मांय न्यारा-न्यारा महकमां रा संयुक्त सचिव लेवल रा अहलकारां सागे बातचीत कर रह्या हा। मुख्य सचिव अहलकारां ऊं नुवी योजनावां सारू राय देवण अर जनता रा भला री नीतियां ऊं जुड्या काम आगे बधावण सारू कर्हयो।

000

इंडो-अमेरिकन चैम्बर ऑफ कॉमर्स-आईएसीसी राजस्थान चैप्टर री सरूआत कीनी है। ओ चैप्टर भारत अर अमेरिका बीचे माली रिश्ता मजबूत करण सारू प्रदेश मांय कारोबार अर निवेश ने बधावो देवण वाळा मंच रा तौर ऊं काम करेला। उपमुख्यमंत्री दिया कुमारी जयपुर मांय चाल रह्या द ग्रेट इंडियन ट्रेवल बाजार-जीआईटीबी मांय आज इण रो उदघाटन कीनो। ई मौके खबरनवीसां सागे बातचीत करता थकां उप मुख्यमंत्री कर्हयो के ओ चैप्टर राज्य रा उद्योगपतियां ने अमेरिकी कम्पनियां सागे जोड़बा अर दोन्यू पार्टियां बीचे कारोबार बधावण री कोशिश करेला।

कार्यक्रम मांय आईएसीसी रा पैली वाळा राष्ट्रीय अध्यक्ष ललित भसीन कर्हयो के ई चैप्टर रे जरिये कारोबारियां बीचे संपर्क मजबूत व्हेला।

000

राज्य मांय जनगणना 2027 रो पहलो दौर एक मई ऊं सरू व्हेला। 15 मई ताई स्व-गणना व्हेला। देश मांय पहली दफा स्व-गणना रे जरिए लोग खुद पोर्टल माथे जनगणना अनुसूची भर सकेला। 16 मई ऊं 14 जून ताई घर-घर जा र मकानां री गिणती करी जावेला। नागौर रा जिला कलेक्टर देवेन्द्र सिंह जनता ऊं जनगणना रा काम मांय मदद करण री अरज कीनी है।

000

रक्षा मंत्री राजनाथ सिंह आतंकवाद, अलगाववाद अर उग्रवाद रो सामो करण सारू न्यारा-न्यारा देशां ऊं एकजुट व्हेवण री अरज कीनी है। श्री सिंह किर्गिस्तान रा बिश्केक मांय सीमा पार आतंकवाद परिषद्-एससीओ रा रक्षा मंत्रियां री मीटिंग मांय बोल रह्या हा।

वे पहलगाम मांय व्ह्या आतंकवादी हमला रा पीड़ितां ने याद करता थकां कह्यो के ऑपरेशन सिंदूर रे दौरान भारत दुनिया ने आतंकवाद रे खिलाफ करडो रुख बता दीनो। रक्षा मंत्री कह्यो के आतंकवाद री कोई विचारधारा अर राष्ट्रीयता नी व्हे है अर आतंकवाद रे खिलाफ भेळी कोशिशं ज़रूरी है।

-----

000

केन्द्रीय सड़क परिवहन अर राजमार्ग मंत्री नितिन गडकरी कह्यो है के भारत री परिवहन प्रणालियां दुनिया रा मानदंडां रे मुजब व्हेवणी चाहिजे, ताकि जनता ने सुरक्षित, कारगर अर सुविधाजनक सफर रो अनुभव मिल सके। वे आज नई दिल्ली मांय बस वर्ल्ड भारत सम्मेलन-2026 मांय बोल रह्या हा। श्री गडकरी कह्यो के देश मांय बेहतर हाई-वे बण जावण ऊं सफर रो बगत कम व्हयो है। श्री गडकरी बतायो के देश मांय 36 नुवा एक्सप्रेस-वे बण रह्या है, जिण ऊं हिफ़ाज़त सागे तेज़ अर पर्यावरण री हिफ़ाज़त सागे आवण-जावण ने बधावो दियो जा सकेला।

000

केन्द्रीय शिक्षा मंत्री धर्मेन्द्र प्रधान मौजूदा शैक्षणिक सत्र सारू राष्ट्रीय शैक्षिक अनुसंधान अर प्रशिक्षण परिषद – एनसीईआरटी री किताबां री उपलब्धता, छपाई अर वां ने बांटण रा काम रो जायज़ो लीनो। शिक्षा मंत्रालय रे मुजब श्री प्रधान राज्यां अर केंद्र रा राज वाळा प्रदेशां मांय पोथियां री उपलब्धता खास तौर ऊं गांवांई हलकां रा विद्यार्थियां ने किताबां टेमसर मुहैया करावणो तैय करण सारू राज्य प्रशासन अर बांटण वाळी एजेंसियां बीचे तालमेल रा बारा मांय ई जाणकारी लीनी। श्री प्रधान आपूर्ति श्रृंखला मजबूत करण, छपाई बधावण अर मोटा पैमाना माथे पहुंच तैय करण सारू अहलकारां ने ज़रूरी हुकम ई दीना। वे किताबां विद्यार्थियां कने पूगण ताई ई-पाठशाला रे जरिये डिजिटल तरीका ऊं किताबां री उपलब्धता रो ई जिक कीनो ताकि विद्यार्थी पढ़ाई जारी राख सके।

000